

PRIMERA CARTA DEL APÓSTOL SAN PABLO A

TIMOTEO

Pablo escribe a Timoteo

1 ¹⁻²Yũ, Pablo ati pũuro mũ yũ uca joo Timoteore. Dio caroorije mani cátiẽ wapare manire canetoobojau ãmi. Camajare cũ caqueti buio teña rotii yũ ã. Mani Ʋpau Jesucristo quena to bairona yũ caqueti buio teña rotiwĩ. Cũ Jesucristo mani catũgooña nũcũbugou ãmi. To bairi petocã mũ yũ queti buiopa ati pũuro jũgori. Caroaro mũre yũ ñuu roti, Timoteo. Jesu ye quetire mũ yũ cabuioirije apiri mũ caapiũja jũgowũ. To bairi yũ macũ majuure bairo cãcũ mũ ã. Mani Pacũ Dio, mani Ʋpau Jesucristo mena caroare mũre cũ joato. Mũre cũ mai tũjuato. Caroaro ani yeri wariũuurique mũre cũ joato.

Advertencia contra enseñanzas falsas

³Efesopũ mani cãno, Macedoniapũ aãgũ jũgoye topũna mũ yũ catua rotiwũ, ricati cabuioirãre na mataya ñi. Apeye Jesu ye queti cariape cãniqueti wamere caĩ buioirãre, “Aperãre caĩtorijere, caũuuquẽtiere na ñ buioqueticõato ñi, caroaro nare ñ buioya,” mũ yũ caĩwũ Timoteo. ⁴“Na ñicũ jãa na cãnaje cutajere buiorica wamere na cawada jana majiquẽtiere api nũcũbugoqueticõaña,” na mũ ñgũ ñi, mũ yũ cacũwũ Efesopũre. Camaja to cãnacãũna ricati, “Ocõo bairo ãnato,” ame ñbana ame wada netoborãma na majuuna. Tie caũuuquẽtie ã. To bairi tiere apiũjarã Dio cũ caboorije majuu macare áti majiquetiborãma. Dio yere api nũcũbugo nutuaquetiborãma. ⁵To bairi caũuuqueti wamere na caapiũjaro booquẽemi Dio. Na ame maiato ñi, cariape quetire na camajiro boomi Dio. Cariape wamerire majirã caroorije na yeri catũgooñarijere janari, caroa wame macare áti jũgogarãma yua. To bairo áti jũgorã cariape Jesucristore tũgooña ocabutiri, caroaro ame maigarãma. To bairo maca camajare na mani caĩ buiuro boomi Dio. Ricati wame booquẽemi. ⁶Jĩcaarã to macana maca ricati maca queti buionucuma camajare. Dio yere cariape macajere cajanarãre bairo ape wame macare queti buionucuma. Nee cátipe mãni wamere queti buionucuma. ⁷Dio cũ carotiriquere aperãre cabuioirã anigabapa. To bairo baigabana quena tiere maji peoquetinucuma ricati cabuionucurã maca. To bairo baicõari catũgooña mawijiori wame buionucuma, na majuuna majiquetibana. ⁸Mani maji, Dio cũ carotirique, Moisé cũ caucarique caroa

wame ā, manire Dio cū caboorore bairo tiere mani cáto. ⁹⁻¹⁰Ape wame quenare camajipe ā manire. Caroaro cána macare na yū popiyeyegū īi mee cacūñupi Dio cū carotiriquere. Caroorije cána maca caroorijere áti janari caroa macare na áparo īi, cacūñupi Diore cū carotiriquere. Na maca cūre caneto nucarā āma. Cū carotirore bairo cáti quēna āma. Diore cū cáti nūcūbugoquēna āma. Caroorije cáti pairā āma. Diore booquēema. Cū ye quenare booquēema. Aperā na pacuarena na jīama. Aperā cajīa pairā āma. Aperā na nūmoa romiri cāniquēna mena cáti epericarācūna āma. Aperā caumua na majuuna cāromia na cátoe bairo cáti eperā āma. Aperā camajare na ñe, aperāpure na joo netori wapa jeema. Aperā caīto pairā āma. Aperā, “Cariape jā īi,” jocarāna itonucuma. Aperā noo cabooro cariape cāniquētiere cáti pairā āma Dio to bairo ája cū caīquētiere. To cānacā wame caroorije cáti pairā tiere áti janari, Dio cū caboorije macare na áparo īi, cacūñupi Dio cū carotirijere. ¹¹Dio cañuu majuu cariape cānie, caroa quetire yū cabuio teña rotiwī cū ye quetire.

Gratitud por la misericordia de Dios

¹²⁻¹³Tirumāpure mani Ūpaū Jesucristo ye quetire yū cabooquēpū. Cū catūjooquētiere yū caī wadanucuwū. Cūre caapijārāre na jīa peogabacu rooro na yū cátinucuwū. Caroaū Dio cū cāniere yū camajiquēpū, cūre apijajuquetibacu. To bairo cabaii yū cānibato quena yū camai tūjūwī mani Ūpaū Jesucristo. Yūre mai tūjūri yūre canetoobojawī caroorije yū cátajere. “Caroaro yūre caapi nūcūbugou anigūmi,” yū caī tūjūwī Jesucristo. To bairo yūre ī tūjūri, cū ye quetire cabuio teñapāure yū cacūwī. To bairo yū cūri yū cabuio teña ocabūtipere yū cajoowī. To bairo cū ye quetire cū cabuio teña rotiricu aniri, “Ñuu majuucōa,” cū yū ī. ¹⁴Caroaro majuu yūre cátiobojawī mani Ūpaū Jesu. To bairi Jesucristo jugori Diore yū tūgoōña nūcūbugo yucūra yua. Seeto cūre yū mai.

¹⁵Ati wame cariape yū queti buio. Camaja nipetirā atiere na caapijāpe boo. Jesucristo caroorije cānare na netooū acū caejayupi ati yepāpure. Yūna yū ā nipetirā netoro cáti netoo nucaricu. ¹⁶To bairo nipetirā netoro cáti netoo nucaricu yū cānibato quena yū cabopacoo tūjūwī Jesucristo. Yūre bopacoo tūjūri, “Caroorije yū cátajere majirioya,” yū caīpere yoaro yū cacoteyupi Jesucristo, patowācaquēcūna. Camajare na bopacoo tūjūri caroorije na cáti janape, cūre na caapijāpere patowācaquēcūna yoaro nare cū cacoterijere na majiatio īi, “Caroorije yū cátajere majirioya,” cūre yū caīpere cacotewī Jesucristo. To bairi noa una camaja caroaro Jesucristo yūre cū cátiere tūjūrā, “Mani quenare mani netoo majimi Dio,” ī tūgoōña majigarāma yua. Na quena Jesucristore apijāri cū mena anicōa aninucugarāma. ¹⁷To bairi, “Caroaū majuu āmi Dio,” nūcūbugorique mena cū mani inucurā. Caupaū majuu cānicōa aninucūā āmi. Cabai yajipāū me āmi. Cabauquēcū jīcaūna cācū camaji netoū āmi. To bairona āmi. ¹⁸⁻¹⁹Timoteo, yū macūre bairo cācū, ocōo bairo mūre yū queti buionemogu: “To bairo ája,” mūre yū caīrijere caroaro ája. Caroaro tūgoōñaña mani yarā cajūgoye Dio cū carotiro mena mūre na caīriquere. “Jesure caapijārāre caroaro na jugo anigūmi Timoteo,” mū caīwā mani yarā mū cabaipere. Tiere caroaro tūgoōñaña tunu. To bairi popiye baibacu quena caroa jetore ája. Cariape queti buioriquere janaqueti majuucōaña. Cariape macaje jetore ája, cabui mácu anigū. Aperā maca cariape na cátiopere majibana quena cátiqējupa. To bairo cariape macaje

átiquetibana Jesure na catugooña núcubugobatajere camajiritiyupa. ²⁰To bairona cabaiyupa Imeneo, Alejandro quena. Rooro ĩ buioma naa. To bairi, “Diore rooro mani cañijere cajanaparã mani ã,” na ĩato ĩi, Satanã maca dope bairo nare cū cátiġaro cū áparo ĩi, na yū cabuio janawū yua.

Instrucciones sobre la oración

2 ¹Ocoo bairo mū yū ĩ buio ĵugogū: Aperã Diore na jenibojaya, nare cū átinemoato ĩrã. Camaja nipetirãre na jenibojaya Diore. Mūja ye cãñipe quenare Diore cū jeniya. Cū jeniya, “Caroarō ĵãre mū átibojanucu, ñuubūja,” Diore cū ĩña. ²Ūparãre nipetirã carotirãre Diore na jenibojaya. Camajare carotirã caroarō na cajūgo aniparore bairo Diore na jenibojaya. To bairo caroarō camajare na cajūgo âmata ame tutirique mano caroarō mani anigarã. To bairo ãnaa Dio cū caboorore bairo mani ani majigarã. ³Aperãre Diore na mani cajenibojaro ñuubūja. Dio manire canetoo caroarō manire tujū wariñuugumi to bairo mani cáto. ⁴Camaja nipetirã caroorije na cátiere na netoobojagabapi Dio. To bairona cariape queti buioriquere na camajiro boobapi. ⁵Jĩcauna ãmi Dio. Apei maami. To bairo quena jĩcauna ãmi Jesu mani camaja caroarō Dio mena mani cãñipere cáti majii. Jĩcauna ãmi cū Pacu Diore manire cajenibojau. Jesucristo jetona ãmi camajocu, manire bairona carupaucucu caroarō Dio mena mani cãñipere cáti majii. ⁶Jesucristo cabai jajiyupi caroorije mani cátiye wapa, camaja nipetirã caroarō Dio mena na âmáro ĩi. To bairo manire cū cabai jajibojaro Dio cū cabooricarore bairo cabaiyupi Jesu. To bairi, “Camaja nipetirãre netoogami Dio,” mani ĩ maji, “Manire cabai jajibojayupi,” ĩ tūgoonãri. ⁷Tie caroa quetire yãre cabuio rotiwĩ Jesu. Judío maja cãñiquẽna cūre na canúcubugoro boū, cariape macajere nare cabuiopãre yū cacūwĩ. Jesucristore caapijau aniri cariape mū yū ĩ, Timoteo. Ītorique me ã.

⁸To bairi nipetiropu Jesure canúcubugorã na caneñaporopu caumua Diore cajeni núcubugorã na cãno yū boo. Roorije cátiquẽna, ñumugori Diore cajenirã na cãno yū boo. Caame punijinirique mana, caame tutiquẽna na cãno yū boo. ⁹To bairi cãromia maca canúcubugorã romiri na cajanãnucurijere bairije cajanape ã jutiire. Caumua ĵãre na tujū ũgari peato ĩrã mee to bairije cajanape ã. “Aperã netoro caroarã ĵã ã,” ĩ tūgoonãri ricati wame cawuga peoquetipe ã. Apeye caajiyarije, cawapa paca netorije wamagariquere cajanã netoquetipe ã. Aperã, “Caroarã romiri ãma,” na ĩato ĩrã caroarō jeto cátinucepe ã. ¹⁰Diore cáti núcubugorã romiri na cátinucurore bairona cátiye ã. Caroarō aperãre cátinemonucurã cãñipe ã. To bairona na âmáro cãromia, aperãre na tujoo rotirã. ¹¹⁻¹²Cãromia caumua macare na carotipere, nare na cajūgo buiope quenare yū booquẽe. To bairi mūja caneñapo bueri paū cãromia maca cajūgo buioū cū cañijere wadaquẽnana caroarō na apijãato. ¹³⁻¹⁴Ocoo bairo ã: Dio Adãre cáti ĵugoyupi. Cū bero Evare cájupi. To bairo nare cū cáti yaparoro bero, caumu maca meere, cãromio macare co caito ĵugoyupu Satanã. To bairo cū cawadajã ecoorico aniri Diore canetoo nūca ĵugoyupo. To bairi caumua carotiparã me ãma cãromia maca. ¹⁵To bairo Eva co canetoo nucarique to cãñibato quena caroorã ya paupū na cayajibopere netoogãma cãromia, Diore apijãari. Cūre na caapijaro, caroarō na capunaacuto, aperãre na camairo, tūgoonã majirique mena caroare na cátinucuro, to bairo caroarō cūre na caapijaro na netoogumi Dio cãromia quenare.

Cómo deben ser los obispos

3¹ Cariape macá wame á atie: Noa una Jesucristore caapiujarãre cajugo ãna anigarã caroa wamere cána anigarã baima. ²To bairi Jesure caapiujarãre cajugo aniparãre ocõo bairo cabairãre na bejeya. Camaja, “Caroorije cána áma,” na caiquênare cabejepe á. Jícao jeto canũmoa cunare, cáti epericarã cutiquênare boo. Na cátipere caroaro catũgoõna maja catirãre boo. Na cânaje cutiere Dio cu caboorore bairo catũju beje majirãre boo. Aperã na canũcubugorã unare boo. Cáaáteñarã ejarãre caroaro, “Jã tũpũ ãña,” caí wariñuurã unare boo. Aperãre caroaro Dio yere cabuio majirãre boo. ³To bairi Jesucristore caapiujarãre cajugo aniparã caeti cumu pairã, catuti maca pairã quenare booquêe. Aperã mena caroaro câni majirãre boo. Aperãre capunijinirãre booquêe. Apeye uniere caboo netorã, caniyeru boo netorã câniquetipe á. ⁴To bairi Jesure caapiujarãre cajugo ãna na ya wii macanare caroaro caroti majirã na ámaro. Na punaa maja catirique menare caroaro na cabuiorijere na caapiujaro cânare cabejepau mu á, Timoteo. ⁵Na ya wii macanare na cajugo ani majiquêpata, dope bairo Jesure caapiujarã quenare na jugo ani majiquetiborãma. To bairi na ya wii macanare caroaro cajugo ani majirã jetore boo. ⁶Nemoona Jesure caapi nũcubũgo jugoricarã unare cabejepe á caapiujarãre na cajugo aniparãre. Na bero, cawama apiujaricarãre bejequêja. Cawama apiujaricarãre mu cabejeata, “Aperã netoro caroti majirã já á,” í tũgoõnaborãma. To bairo í tũgoõnabana tirumũpu Sataná, “Aperã netoro caroti majii yu á,” cu caí tũgoõnaricarore bairona bai bui cutiborãma. To bairo rooro na cabairo Satanãre cu cáatatore bairona na popiyeyeboumi Dio, na quenare. To bairi nemoona Jesure caapiuja jugoricarã una macare boo, cajugo aniparãre. ⁷To bairi caroa jeto cátiparã áma. Caroaro cána na câniquêpata aperã maca na nũcubũgoquetiborãma, Dio ye quetire caapiujaquêna maca. Caroorije quetire na í buio bateborãma. Sataná maca to bairo na cáto boumi. To bairi caroaro cariape cáti ani majirã jetore boo, Jesure caapiujarãre cajugo aniparãre.

Cómo deben ser los diáconos

⁸Jesure caapiujarãre cajugo ãnare cátinemorã Dio yere capaa cotebojarã na cânipe quenare mu yu buiogu. Na quena, “Caroarã áma,” aperã na caí nũcubũgorãre boo. Caítoquetiparã áma. Caeti cumu pairã unare booquêe. Caroorije átiri cawapatarã quenare booquêe. Caroa macaje paari cawapatarã macare boo. ⁹To bairi Jesu ye queti cariape macajere caapi nũcubũgorãre boo. To bairi, “Cabuicũcu mee yu á,” cariape caí majirãre boo. ¹⁰To bairi Dio yere capaa cotebojarãre na cũgarã jugoye yoaro na catũju majipe á, çto bairona caroaro cána na áti? í majigarã. To bairi caroarã, cabui cutiquêna na câno tũjurã to cõona na cacũpe á. ¹¹To bairi na nũmoa quena, “Caroaro cána áma,” aperã na caí nũcubũgorã romirire boo. Aperãre, “Rooro áma,” nare caí buio baterã câniquetiparã áma. Na cátipere caroaro catũgoõna maja catirã câniparã áma Dio yere capaa coterã na nũmoa quena. Cariape, na caĩrore bairona cáti ocabutirãre boo, caitoquênare. ¹²To bairi Dio yere capaa cotebojarã tunu to cânacãna jícao jeto canũmoa cunare boo. Na punaa, na ya wiiri macanare caroaro caroti majirãre boo. ¹³To bairi Dio yere capaa cotebojarã caroaro na cáto tũjurã nare nũcubũgogarãma camaja. To bairo quena Jesucristore

na canucubugorijere uwiquēnana, boboquēnana aperāre na queti buio ocabutigarāma.

El secreto de nuestra religión

¹⁴⁻¹⁵ Yoaro mee mu tupa yu aagu, yu tugoona. To bairo aagabacu quena yoaro mee yu aa majiquetibon ii ati puuro mure yu uca joo. Dio yarā ocõo bairo caniparā āma ii mu yu uca joo. Dio canicõa aninucuu cu ye quetire caapiujari poa macana mani ā. To bairi cu yarā aniri cariape cu caqueti buioriquere mani queti buio netocõa anigarā. ¹⁶ Atie queti buiorique mani caapi nucubugori wame, caroa wame cāni majuuri wame ā. Ocõo bairo ā ti wame queti buiorica wame:

Jesu ati yepapu buiaa mani camajare bairona rupa

cūtiri caroa jetore cājupi. Espiritu Santo,

“Jesucristo caroa majuu āmi,” cu caī buioyupi.

Ángel maja Dio tu macana quena cu catujuyupa.

To bairi ati yepa nipetiropu cajejayupa Jesu ye quetire.

To bairi tie quetire apirā ati yepa nipetiri pa

jicaarā caapiujayupa. To bairi mani Pacu Dio maca

Jesure cu cane aājupi tunu jō buipa yua.

Atie ā caroa queti buiorique mani caapi nucubugori wame.

Los que se apartarán de la fe

4 ¹ Espiritu Santo, caroaro manire majiomi ocõo bairi wamere: Ati umurecoo capetiparo jugoye jicaarā Jesucristo ye quetire na caapigabatajere boquetigarāma. To cõona api janagarāma. Cariape cānie Jesu yere api janari ricati cabuorā, caitorā na caī buiorije macare apiujagarāma. Wātia Satanā yarā na caitorijere na caqueti buio joo rotirā macare apiujanucugarāma. ² To bairo ricati caī buiorā maca, “Itoriqere buiorā jā āa,” i tugoona jutiriti majiquēema, yoaro caito jeeyarā majuu anibana. ³ Camajare wamo jia rotiquēema. Jica wamerire uga rotiquēema. Dio maca ugarique to cānacā wame cacūñupi cariape macajere camajirā na caugapere, Jesure caapiujarā na caugapere. Tere ugari, “Caroaro jāre mu jooyupa,” yure na iato ii cacūñupi Dio to cānacā wame ugariquere. ⁴ Tie ugarique nipetirije Dio cu cacūrique caroa jeto ā. To bairi Dio cu cacūrique, “Atie cu cauga rotiquētie ā,” i majiña maa. To bairi tie ugariquere bugarā, “Caroore jāre mu jooyupa,” Diore iricarona nuu. ⁵ To bairi ugarique, mani caugape maca to bairo Diore mani cajeniro jugori nuubuja. Dio manire cu cairicarore bairona nuubuja.

Un buen siervo de Jesucristo

⁶ To bairijere mani yarāre na buionucuu caroaro nare cajugo ācu mu anigu Timoteo. Jesucristo cu caboorore bairo caroaro cariape cācu mu anigu. To bairi Jesucristo ye queti cariape macaje apiujanucucõari Jesure cu caboorore bairo cu mu āti uja nutuagu. ⁷ Aperā ati yepa macana Diore caapiujaquēna maca caroorije, na cabuio macarijere apiqueticõaña. Na caqueti buiorije ñe unie ātiya mano. Wapa maa tie. Dio cu caboorije cañuuriye macare ocabutirique mena ātinucocõaña. ⁸ Tutuaro mani capaaro nuubuja. To bairo tutuaro mani capaaro mani rupa caroaro ocabuti. To bairo to cānibato quena Dio cu caboorije cañuuriye maca ocabutirique mena mani cātie netoro cañuuriye ā. Ati yepa ānaa tiere mani cāto caroaro

mani joogumi Dio. Cabero ape umurecoorpũ jõ buipũ mani cãno quena caroaro wariñuuriqere mani joogumi Dio. ⁹Atie mure yũ caqueti buiorije caroaro cariapena ã. To bairi camaja nipetirã na caapiũjape boo. ¹⁰Tiere na apiũjaato irã mani maca popiye mani bai. To bairo popiye baibana quena, mani paa janaqueticõagarã. Dio cũ caqueti buio cõriquere mani queti buiocõa aninucugarã. Mani Upau Dio cacaticõa aninucũ manire cũ caĩricarore bairona manire átigumi. Manire netoogumi. Nipetirãre canetoo majii ãmi Dio. To bairo nipetirãre na netoo majibacu quena cũ ye quetire cariape caapi nũcũbugorã jetore na netoogumi yua. ¹¹To bairo mure yũ caqueti buiorijere aperãre na ï buiori caroaro na áti uja rotiya.

¹²Cawamaũ mũ ã, Timoteo. To bairo cawamaũ mũ cãnibato quena, mure canũcũbugoparã ãma. “Cawamaũ anibacu majiquẽcumi,” mure na ï tũju rocaqueticõato to macana. Nare cajũgo anipau mũ ã cabucu aniquetibacu quena. To bairi caroaro nare buiocõa aninucũna. Caroaro ãnajecũja. Aperãre na mairi nare átinemoña. Popiye baibacu quena, Jesucristore caroaro tũgoõna nũcũbugo ocabutiya. Caroorije átiqũja. To bairo mũ cáti aniere tũjuri to macana Jesure caapiũjarã mure bairona anigarãma na quena caroaro. ¹³To bairi topũ yũ caejaparo jũgoye muja caneñaponucuri pau Dio ye queti tirũmũpũ macana na caucariquere na bue iñoonucũna. Dio ye quetire caroaro na buionucũna. ¹⁴Yũ yaũ, nemoona Jesure caapiũjarãre cajũgo ãna Dio yere mũ cáti majipere caqueti buio jũgoyeyewã. Diore mũ jenibojari, mũ ñupeori mũ cáti majipere caqueti buio jũgoyeyewã. To bairo na cáto Dio cũ yere mũ cáti majipere cajooypũ. To bairi Dio yere mũ cáti majiri wame cõona Dio mure cũ camajiori wame átinucucõaña. ¹⁵Atiere mũ yũ caĩ uca joorijere caroaro áti ocabuti aninucũna. To bairo mũ cáto camaja, “Caroaro manire cajũgo ãcũ ãmi Timoteo,” mũ igarãma yua. Caroaro mũ cáti nutuatiere tũjugarãma. ¹⁶To bairi mũ cáti, aperãre Dio yere na mũ cabuorije quenare caroaro tũgoõna maja catiya, ¿cariape jeto to áti? ïi. To bairo ãcũ, mũ yajiquetigu. Mũ cabuorijere caapirã quena yajiquetigarãma.

Cómo portarse con los creyentes

5 ¹Ape wame mũ yũ queti buionemogu tunu Timoteo: Jesure caapiũjarãre tutirique mena na buioqũja cabucũrãre. Nũcũbugoriquere mena maca na buioya, mũ pacuare na buioũre bairona. Cawamarã quenare mũ bairãre cabuioũre bairo caroaro na ï buioya. ²Cabucũrã romirire mũ pacoa romirire buioũre bairona caroaro na buioya. Cawamarã romirire mũ bairã romirire ácũre bairona caroaro na ája. Caroorije nare tũgoõnaricarõ mano na buioya cawamarã romirire. ³Cawapearicãrã romiri quenare cátinemoña manare na átinemoña. ⁴Aperã cawapearicãrã capunaacũna, capãramerãcũna macare na punaa, na pãramerã nare cátinemoparã ãma. Nemoorpũna na ya poa macanare caroaro na tũgoõnari na cátinemoparã ãma. To bairo na pacua nare caroaro na cáttore bairona nare átinemo amegarã baima. To bairo tiere mani cáto tũjoomi Dio. ⁵Cawapearicãrã cacoteya mana maca, “Yure átinemogumi Dio,” ï tũgoõna wariñuuri cũre cajeni nũcũbugorã ãnama. Umureco quenare, ñami quenare Diore jeninucurãma. ⁶Aperã cawapearicãrã romiri rooro ãnama. Na caugari pearije jetore átigãnucurãma. To bairo átibana catũgoõna maja catĩquẽna ãma. ⁷Atie nipetiro mure yũ caqueti buio joorijere caroaro na buioya Jesure caapiũjarã to macanare. To bairije caroaro na cáto, “Caroorije

cána âma,” na ïquetigarâma aperâ maca. ⁸To bairi noa una na yarâre na câtinemogaquêpata cañuuquêna âma. Na ya wii macana majuure câtinemogaquêna, Dio ye quetire bai netoo nucarâ âama. Diore caapiujaquêna netoro cañuuquêna âma, na yarâre na câtinemogaquêpata.

⁹Jesu ye quetire caapiujari poa macana cawapearicarâ romirire na câtinemope â. To bairi papera pûuropu na wameri ucari ocôo bairo cãnare muja âtinemogarâ: Cabucurâ sesenta cumari cacugorâ, netobujaro cacugorâ quenare. Jîcaurena camanapu cutana. ¹⁰“Aperâre caroaro na câtinemoricarâ âma,” aperâ na cairâ. Na punaare caroaro camajooricarâ. Aperâ na ya wiipu cãaâteñarâ ejarâre caroaro na câni rotificarâ. To bairi Jesure caapiujarâre câtinemoricarâ, cabopacoorâre na câtinemoricarâ. Noo caboori wame aperâre caroaro na câtinemoricarore bairona Jesure caapiujarâ câni poa macana quena cawapearicarâ romiri. To bairo cabairâ jeto na wameri ucari nare muja âtinemogarâ. ¹¹Cawamarâ romiri cawapearicarâ maca na wameri muja ucaquetigarâ. Jesure caapiujari poa macana na câtinemoparâ me âma. Cawamarâ romiri maca yoaro mee Jesu ye na paariquere janacôaborâma, aperâ mena manapua cutigarâ tunu. To bairi na paariquere Jesucristo nare cu cacûbatajere janacôaborâma yua. ¹²To bairi, “Dio yere na câtinemorâ jâ anicôagarâ,” na cairiquere janari cabai buicunare bairo aniborâma. ¹³Apeye tunu jîcaarâ cawamarâ romiri cawapearicarâ Dio yere na paarique janari caroaro âtiqetiborâma. Aperâ ye wiiripu nairoacâ aâteñari dope bairo cabairije rooro wada pai bate teñanucuborâma. To bairona na ye cãniquêtierena jeniñaborâma rooro aperâre buio bategarâ. To bairi Jesure caapiujari poa macana na câtinemonucuparâ majuu me âma cawamarâ romiri cawapearicarâ maca. ¹⁴Aperâre camanapua buganemoparâ âma, cawamarâ romiri aniri. Capunaa cutiparâ âma. Punaacuti, na wiirire cote, cãtiparâ âma. To bairo na una caroaro na cãto, manire cabooquêna maca, “Caroorije âma,” manire ï wada pai majiquetigarâma yua. ¹⁵Naa jîcaarâ cawapearicarâ Jesucristo ye quetire na caapibatajere booquetiri to cõona api janari mere rooro Satanâ cu caboorije macare âtinucuma.

¹⁶Jesure canucubugorâ una caumû o cãromio na ya wiiri macana cawapearicarâ romiri na cãmata na majuuna nare na âtinemoato. Jesure canucubugorâ na câni poa macanare nare na cote rotiqueticõato. To bairo na yarâre na majuuna na cacoteata Jesure canucubugorâ na câni poa macana aperâ cawapearicarâ romiri cacote mani majuucõarâre na cote majigarâma.

¹⁷⁻¹⁸Apeye tunu. To macana Jesure caapiujarâ nare cajugo âna macare na nucubugoato. Aperâ netoro Jesu yere cabuorâre caroaro majuu nare canucubugope â. Dio ye queti ucarica pûuro ocôo bairo ï: “Wecu trigore cawãiau catu amojoreire tierre ugaremi ïra cu rijerore cãia bipequetipe â.” Ape paû ocôo bairo ï ucarique â: “Paari majocure cariape cu cawapayepe â.” To bairona Jesure caapiujarâre cajugo ânare câtinemope â na quenare.

¹⁹Apeye tunu Jesure caapi nucubugorâre cajugo âcu ûcure apeï jîcauna cu cawadajãata cariape apiquêja. Pugarâ o itiarâ maca caroorije cu cãto catujaricarâ jîcaro cõo cûre na caï wadajãro, “Cariape ï wadajãrâma,” muja ï majigarâ. ²⁰To bairi cajugo âcu caroorije cu cãtiere cu cajanaquêpata aperâ Jesure caapiujarâ na caapiropu cu tutiya. To bairo cu muja cãto aperâ maca caroa jetore âticõa anigarâma, “Mani tutirema mani quenare,” ïrâ. ²¹Timoteo, nucubugorique mena mu yu queti buio.

Mani Pacu Dio, to bairi cu Macu Jesucristo mena, to bairi ángel maja cu cabejericarã mena quena nipetirã na caapijoro mu yu queti buio. Atie mre yu caĩ queti uca joorijere cariape ája Jesure caapiujarãre, cajugo ácu aniri. To bairo mu yu caĩ buioricare bairona na ája jıcaro cõona. Jıcaarãre ricatiri átiqũeja. ²² Jıacã mu camajirã unare Jesure caapiujarãre cajugo aniparãre na cũquẽja. Caroaro mu camajiquẽnare cajugo aniparãre na mu cacũro ñuuquetiboro. Cabero na maca caroorije na cápata mu quena caroorije na cátiere mu bai bui cãtinemobou. Mu maca caroorije átiqũecuna anicõaña.

²³ Apeye tunu. Nairoacã mu riayupu. To bairi to cãnacã nina mu paro capuniro, mu cariaro oco jetore caetii anibacu quena ıje oco quenare õcoacã etiya mu paro capuniro.

²⁴ Ape wame tunu. Jıcaarã caroorije na cátiere majirãma aperã nipetirã, baujaro na cáto maca. Aperã maca cayajioroacãpu caroorije ánama. To bairi nemoona caroorije na cátiere majiquẽnama aperã. To bairo nemoona na camajiquẽtie to cãnibato quena, cabero na cátiere Dio cu cabejeri pau cãno camaja nipetirã majicoagarãma yua. To bairi yoaro, caroaro mu catuju majirã jetore cacũpe á cajugo aniparãre. ²⁵ To bairona á cañuurije quenare. Jıcaarã caroaro na cátiere nemoona majirãma aperã nipetirã. Aperã macare caroaro na cátiere nemoona majiquẽnama aperã. To bairo nemoona caroa na cátiere taju majiquetibana quena, cabero camaja nipetirã caroaro majicoagarãma, yajioroacã áti majiña mano camaja na cáti aninucurije yua.

6 ¹ Apeye mu yu queti buionemogu, Timoteo: Dio ye quetire caapiujarã aperãre capaa cotebojarã na ıparãre caroaro nucubugorique mena na catujupe ã. To bairo caroaro na cáto tujuri Diore wada pai majiquetigarãma aperã. To bairona mani queti buioriquere, “Cañuuquẽtie ã,” í wada pai majiquetigarãma aperã paa cotebojari maja na ıparãre caroaro na canucubugoata. ² Jesure caapiujarãre cauparãcuna maca netobujaro caroaro nare canucubugope ã. Ocõo bairo caĩ tũgoõnaqueticõape ã nare: “Yu ıpau yure bairona Diore caapiujau ãmi. Cũre bairona cãcu yu ã. To bairi yu majuuna yu cabooro yu paagu, yure carotipau me ãmi,” na í tũgoõnaqueticõato. Ocõo bairo maca na í tũgoõnaato: “Yu yaure yu camaiore bairo yu camai ãmi yu ıpau, Diore caapiujau aniri. To bairi netobujaro cu yu paabojagu,” na í tũgoõnaato. To bairo caroa átajere na queti buio netonucuña to macanare Jesure caapiujarãre.

La religión y el contentamiento

³ Aperã atie yu caqueti buiorije cãniquẽtiere ricati caqueti buiorã ñuuquẽema. Mani ıpau Jesucristo cu caqueti buio cũriquere, caroaro ani majiriquere cariape na caapiquẽpata ñuuquẽema. ⁴ To bairo ricati wamere caĩ buiorã maca, “Cãni majuurã jã ã, caroaro camajirã jã ã,” caĩ tũgoõnarã ãma. “Jã jeto camajirã jã ã,” cãirã anibana quena ñe uniere majiquẽema. Na majuuna ame wada netogama. “Dio Wadarique ti wame cãiro, ricati ıgaro í,” na majuuna ame í wada canamugama. To bairo ame írã seeto rooye tuuma camaja na cãnibatiere. Camaja maca ame taju ıgooo, ame tuti, roorije caame nucubugoya manie to cabairo roque áama, jocarãna na caqueti buiorije jũgori. ⁵ Rooro catũgoõnacõa aninucurã aniri ame í tutinucuma. Dio ye queti cariape macaje macare majiquẽema. “Dio yere

mani majuuna mani catũgooña nũcũbũgori wamere aperãre queti buiorã mani wapatagarã. To bairi paio apeye unie caroa jetore mani cũgogarã,” i tũgooñama, jocarãna. ⁶Mani maca caroaro Dio ye quetire caapiũjarã aniri caroa wame majuu mani cũgo, mani yeri cãni wariũuuriijere. Capee apeye uniere mani caũgari peaquẽpata mani yeri cãni wariũuuriijere joomi Dio manire. ⁷Ati yeparũ buiarã apeye uniere mani cajee atĩquẽpũ. To bairona bai yajirãpũ quena apeye uniere mani jee aãquetigarã tunu. ⁸To bairi mani caũgapere, jutii uniere mani cajaanape quenare cũgorã, “To cõona yũ cũgotũga,” caĩ tũgooña wariũuupe ã, paibũjaro ugarĩ peaquẽnana. ⁹Aperã maca cũgobana quena paibũjaro booma. To bairo boo netobana Satanã cũ cawadajãrije macare apiũjama. Satanã macare apiũjari, camaja catĩquẽna jeeñama. To bairi na majuuna rooye tua, to bairo carooye tuaricarã popiye tamũogarãma yua. ¹⁰Camaja niyeru, apeye unie paio na caboo netorije jũgori to cãnacã wame caroorije áama. Aperã Jesucristore canũcũbũgobatana apeye uniere boo netobana cũre majiriticõari rooro popiye tamũoma yua.

La buena lucha de la fe

¹¹Timoteo, mũ maca Dio yaũ aniri apeye uniere caboo netorãre bairo baiqueticõaña mũa. Dio cũ cabooro maca ocabũtirique mena átinucucõaña. Cariape macajere átinucucõaña. Diore caroaro tũgooña nũcũbũgocõa aninucũña. Aperãre na maiña. Popiye baibacu quena Diore tũgooña nũcũbũgo janaquẽja. Caroaro nũcũbũgorique mena ãña aperã mena.

¹²Ocõo bairo caroaro mũ yũ i: Aperãre na quẽ netogarã seeto ocabũtirique mena tũgooñama caquẽparã. Mũ quena to bairo na caĩ tũgooña ocabũtirore bairona Dio yere tũgooña ocabũticõa aninucũña. Popiye mena caroare átibacu quena cabero Dio mena mũ cãnicõa aninucupere tũgooñari nũcaña. Cũ ye quetire cabuiopare mũ casũũpuri Dio. To bairo cabuiopau cũ cacũricũ aniri capãarã na caapijoropũ mũ cabuioyupa Jesure mũ canũcũbũgorijere.

¹³Yũcũacã cãni tũjarijere mũre yũ buio. Dio, nipetirãre catirique cajou cũ caapiropũ, Jesucristo quena cũ caapiro caroaro cariape mũ yũ buio. Jesucristo quena cũ cãniere caroaro cabuioyupi Ponsio Pilatore. ¹⁴To bairi cariapena mũre yũ i: Mũre yũ carotirore bairo caroaro cariape apiũjaya atie mũre yũ cauca joorijere. Ricati maca tũgooñaqueticõaña. Noa una, “Nũquẽe Timoteo cũ cáti anie,” na iqueticõato ii, caroaro cariape mũ yũ caĩrijere bairona ája. Mani Uparũ Jesucristo ati yeparũ cũ catunu atĩparo jũgoye to bairo jeto áticõa aninucũña. ¹⁵Dio, “To bairo yũ átigũ,” cũ caĩrica paũ caejaro to cõona cũ joogumi Dio cũ Macũre ati yeparũre tunu. Jĩcaũna ãmi Dio caũnu netou, catutuuaũ majuu. Jĩcaũna ãmi nipetirãre carotii. Aperã carotinuurã netoro carotii ãmi. Cauparã quenare na carotii ãmi. ¹⁶Jĩcaũna ãmi Dio cacaticõa aninucũ. Noo jĩcaũ ũcũ ati yepã cãcũ maca Dio tuacãpũ, seeto cũ majuuna cũ caaji bateropũ cãcũ tuacãpũ, aã majiquẽemi. To bairi ni ũcũ maca Diore catũjuricu maami ati yeparũ cãcũ. Dope bairo cũre na catũjũpe maa. To bairi camaja nipetirã cũre na nũcũbũgoato. Cũ carotinuuriije to petiqueticõato. To bairona to ámaro.

¹⁷Apeye tunu, mũ yũ caqueti buio tũjari wame. Capee apeye uniere cacũgorãre ocõo bairo na i buioya: “ ‘Aperã netoro cãni majuurã mani ã, ñe unie mani rũjaquẽe,’ i tũgooñaqueticõaña mũjaa,” na i buioya. “ ‘Capee caroare cacũgorã aniri caroaro majuuna mani baicõagarã,’ i wariũnu

tugooñaqueticōaña mǎjaa,” na ĩ buioya. Tie na cacugobatie yoaro aniquetigaro. “Yoaro mee peticoagaro. To bairi Dio maca mani caboorije nipetirore sajou āmi. Mani cāni wariñuuro bou, caroaro manire joo netomi Dio nipetiro mani cacugopere,” na ĩ tugooñacōato capee cacugonucurā. ¹⁸Ocōo bairo na ĩ buionemoña caapeye unie pairāre: “Aperāre na átinemoña mǎja cacugorije mena. To bairi aperā na cabopacoorijere tǎjurā, capee na átinemoña. Wariñuuri mǎja cacugorijere na nuniña. ¹⁹To bairo mǎja cáto tǎjuri Dio maca mǎja tǎju wariñuugumi. Capee caroa majuu mǎja joogumi Dio caberou. To bairo cǎ cajooro mǎja ani wariñuucōa anigarā Dio tǎru. Tie maca caroa cānie majuu anigarō,” na ĩ buioya capee cacugorāre yua.

Encargo final a Timoteo

²⁰Timoteo yǎ yǎu, Dio mǎre cǎ caqueti buio cūriquere caroaro queti buiocōa aninucuña. Aperā maca, “Jocǎna ĩmi Timoteo,” mǎre na caĭbato quena to bairona cariape macaje jetore buio janaqueticōaña. Aperā ricati na caqueti buiorijere apiquēja. “Majirique cāni wame majuu jā ĩ,” ĩbana quena ĩtorique jetore ĩ buionucuma. Diore caapijuaquēna na catugooñarije ā na caĭ buiori wame. ²¹Aperā jĭcaarā cariape cānie Dio ye quetire caapibatana maca caĭto pairije macare bueri, Dio ye quetire apigaquēema yucǎra. To bairi na apiqueticōaña mǎa, Timoteo, ricati caĭ buiorāre.

Maní Pacǎ Dio caroaro wariñuu netorique mǎre cǎ joato.

To cōona yǎ Pablo mǎre yǎ queti joo.